

古典詩 第二名



張國彥

出生：民國7.年生

學歷：四川大學畢、中國地政研究所畢

現職：退休

八十七年度教育部

文藝創作獎作品集

【古典詩】

不著齋吟草

一、古體詩一首

幽蘭行

陽回煦煦草芊芊，特地尋芳到打簾（臺灣中部地名）；不買嬌花不買竹，為買幽蘭脫塵務，年來書劍共飄蕭，凡心收拾和蘭住！晴朝細雨月明時，無限歡欣難自持；跬步未離蘭左右，從今甘作愛蘭痴。詎知竟有痴似我，最關愛處花開落，嫩黃淺紫正芬菲，叮嚀密意重重約。焚香淨手弄瓊英，幾度沈迷到五更。相對依依若解語，惺惺唯有我憐卿。娉婷曼舞輕盈絕，清才冷艷尤瑩澈，繾綣靈犀脈脈通，柔情萬縷情何切。簾外鶯啼蛺蝶忙，滿園桃李鬥春光，世人都道桃花好，誰認孤標王者香！憶從玉貌移空谷，傷懷多被僮夫誤，臺榭朱樓又畫欄，安得晨昏高士護。此番邂逅識阿儂，惆悵天涯落泊同，如許清才如許貌，那堪寂寞對東風！

二、絕句七首

戊申元旦口占

萬象開新運，春來鬥物華！
雷霆驚蟄伏，大地起龍蛇！

山居雜感

飄萍身世

頽牆秋夜亂飛螢，風冷西窗葉滿庭。
往事低徊難耐處，劇憐身世似飄萍！

臨風醉態

浪跡誅茆野水濱，左無村舍右無鄰。
佯狂醉態誰知我，長嘯一聲仰大鈞！

哀杏壇（其一）

一襲青衫卓不群，鵝湖鹿洞益精勤。
勸君莫笑無氈者，三絕偏多鄭廣文！

哀杏壇（其二）

映雪囊螢苦寂寥，何如國戚正當朝；
楊釗本是無能輩，卻藉裙風上碧霄！

癸亥九月退休呈諸友好（其一）

四十年來得息肩，疏狂未積買山錢。
徜徉祇合追陶令，把酒酣吟別有天！

癸亥九月退休呈諸友好（其二）

把酒酣吟別有天，含飴恰是弄孫年。
敢祈玉帝隆恩許，長謫凡塵作酒仙！

三、律詩七首

暮春述感

蹀躞階前有所思，云胡青帝亦偏私！
綠肥竟許留高樹，紅瘦翻教落溷池；
不見鶯忙捎悴蕊，徒憐蝶怨繞空枝！
闌珊花事愁無奈，況值昏天暮雨時！

秋日即興

蘆白楓紅正好秋，閒身端的勝王侯。
事能知趣心常逸，人到安貧意自悠；
未許縱橫追失鹿，合當纏繞往迷樓。
菊黃恰是持螯日，夜短何妨秉燭遊。

花甲書懷

六十年前甫墜塵，飄零海嶠卅餘春。
苟全亂世原無奈，淒絕浮生竟不辰！
未叱風雲嗟我陋，猶披肝膽照人真。
滿懷壯志消磨盡，惆悵天涯老此身。

亂離剩得體康強，耳目聰靈髮未蒼。
綠柳當門懷靖節，青溪把釣效嚴光；
蹉跎往事堪誰怨，荏苒韶華祇自傷！
喜待期頤稱壽日，看花尚有卅年忙！

退休雜詠

攢眉搔首付哦吟，攬鏡空嗟白髮侵。
罔極親恩長刻骨，衰微世道總驚心！
豈真散木堪為棟？畢竟僮夫祇拜金！
蒿目時艱徒悵望，海天無際暮雲深！

古稀漫興

七十年前甫墜塵，棲遲海嶠作流民。
歷經溷世多艱路，自有金剛不壞身；
孰信烏鴉堪變鳳？愴懷符拔竟充麟！
夜深何懼敲門鬼，敢詡平生未負人！

八十長吟

八十年前甫墜塵，天涯猶是未歸人。
洞明世事須看破，磊落胸懷莫認真；
戢影埋名聊避俗，養身樂道亦安貧。
何時更到嚴灘去，煙水茫茫擲釣綸！